

AKASHVANI AIZAWL
REGIONAL NEWS BULLETIN

Wednesday, September 17, 2025

HEADLINES (MORNING):-

- 1. Kolasib-ah ILP chungchang leh ruihhlo tawlhruk chungchang zirhona DC kaihhruaiin neih a ni
- 2. CSS hnuaia thawk intelkhawm AMCECC chu an thil ngiat nawr nan vawiin atangin tiamchin awm lovin an chawl dawn.
- 3. Mauritius Prime Minister Navinchandra Ramgoolam chuan nimin khan Rashtrapati Bhavan ah President Droupadi Murmu a hmu.
- 4. Union Agriculture and Farmers' Welfare Minister Shivraj Singh Chouhan chuan kum 2025-26 Rabi season chhungin buh tonne makdtaduai 362.50 thar tum a ni a ti..

<><><>

KOLASIB ILP SEMINAR

Kolasib-ah DC Pu Robert C. Lalhmangaiha kaihhruaiin nimin khan 'Seminar on ILP & Prevention and Reduction of Illicit Trafficking of Contraband Drugs ' pualin hun hman ani a,

DC chuan, Kolasib District chu State dangte tana luhka anih angin Dan phalloh a zawrh Ruihhlo leh a kaihhnawih te man a, khuahkhirh leh a Dona kawngah tha thlah lovin tan reng a ngai a ti a, Dan leh thupek kengkawhtu hrang hrang- Police, Excise force, tlawmngai pawl leh VC te lungrual taka kan thawhho a pawimawh ani, a t. Ram leh Hnam hmel lanna an nih avangin Kolasib District chhunga cheng mipuite nen an thawhhona a that phawt chuan Zu leh Ruihhlo te hi an tirem thei ngei in a rinawm ani, a ti bawk.

DC chuan, Inner Line Permit (ILP) pek chhuah chungchangah leh Hnamdang Sponsor chungchangah ram leilung fate an fimkhur in, mahni mawhphurhna an hlen chhuah a tul hle, a ti a, Hnamdang chhawr tura chah chhuaktu ten Permit a in ziak angin an mawhphurhna hrang hrangte an ngaih pawimawh a tul a ni, a ti bawk.

Kolasib Sr. SP Pu David H. Lalthangliana chuan kumin January thla atanga tun thla ni 16 inkara an hmalakna leh hlawhtlinna te tarlang in, Ruihhlo hmansual khapna Dan ND&PS Act hnuaiah thil tisuala puh mi 9 an man a, heng mite hi mipa 5 leh hmeichhia 4 anni in, thubuai siamsak anni. Ruihhlo an man te hi- Heroin Gram 89.75 leh Methamphetamine Kg 23.43 niin Ganja Kg 10.155 an man tel a, Ruihhlo leh Ganja hi a vai in tualchhung rate ah cheng vbc 3 leh nuai 2 hu ni a chhut ani. Hemi hun chhung vek hian Kolasib District Police te chuan Kuhva rah ro Bag 14254 zet an man a, hemi rual hian Kuhva phurh nana hman Lirthei 12 leh a phurtu a puh mi 12 an man bawk. Kuhva rah ro hlutna hi tualchhung rate ah cheng vbc 2 chuang hu ni a chhut ani.

Kolasib District Police te hian phalna nei lova Zu zawrh leh tawlhruk thahnem tak an man bawk a, an Zu man hlut zawng hi tualchhung rate ah chuan cheng nuai 56 vela chhut ani.

Kumin January atanga nimin thleng khan ILP kaihhruaina bawhchhia Hnamdang mi 166 man in, Vairengte PS a man mi 150 leh Kolasib PS a man mi 16 te chu Dan hmangin an chenna ah thawn kir anni.

(Andrew Kolasib PTC)

<><><>

KAWNPUI-HORTOKI

Kawnpui leh Hortoki inkar kawng enkawl hna chu Mizoram PWD kutah dah a ni leh tawh dawn a, Railways lamin a tul dan a zirin hmanrua an neih ang te hmangin hna an thawh pui thin ang.

Nimin khan Kolasib DC Office chamber ah Kolasib DC Pu Robert C Lalhmangaiha kaihhruaiin, Kawnpui leh Hortoki inkar kawng enkawl dan tur sawiho a ni a. Meeting ah hian

Kawnpui leh Hortoki inkar kawng chu Railways lamin an hman lai kha chuan an hman chin hi a chhiat changin an enkawl a, a bak zawng Mizoram PWD ten an enkawl thu tarlan a ni. Hei hi CM hova an meeting thu ang a nih thu tarlan a ni.

Hetihlai hian Railways hnuaia Contractor ten an hna an thawh zawh tawh avangin he kawng hi bungraw lakluh nan an hmang tawh lo tih tarlan a ni a. Hei hi a kaihnhawih VC te pawhin an pawm thu an sawi bawk ani. Hetiang a nih avang hian Kawnpui leh Hortoki inkar kawng hi Mizoram PWD ten a tluanin an enkawl a ngaih tawh thu Kolasib DC chuan a sawi a. Railways lam pawh a tul angin MPWD te puih an ngaihna ah pui turin a ngen bawk

Meeting ah hian Railways lam aiawh te bakah Kawnpui SDO(C) Dr Doris Lalrinawmi, PWD Kawnpui Sub Division aiawh te leh Kawnpui leh Hortoki khawtlang hruaitute an tel ani.

(Andrew Kolasib PTC)

<><><>

CSS

CSS hnuaia thawk intelkhawm All Mizoram CSS Employees Coordination Committee AMCECC chu an thil ngiat nawr nan wawiin atangin tiamchin awm lovin an chawl dawn.

Aizawl District Magistrate-in thla 2 chhung Sawrkar Office awmna hmun hrang hrangah mi 5 aia tam punkhawm khapna tichhuak mahse Aizawl district-a CSS hnuaa thawkte chu nimin khan Vaivakawna Joint YMA Field-ah pungkhawmin lungawi lohna an lantir a. He hunah hian AMCECC General Secretary Pu Vanlalpeka chuan thusawiin, sorkara an thilngiat nawr nan kumin April ni 15 atanga ni 17 chhungin pen down strike an lo nei tawh a, DP&AR Minister in theihtawp chhuaha bawhzui a tiam avangin April ni 19 ah sorkar nen inremna an siam a, May ni 19-a representation an thehluh chu August thla tawp lama an ngaihvenin, an lehkhah thehluh a bo thu an dawng a, an chhui zelnaah file engmah a kal lo tih an hmuchhuak a ti a, inremna an siam hnuah sorkarin a ngaihtuah ve mai dawn emaw an tih laia a ngaithah chu hreawm an tih thu sawiin, September ni 3-a general body thukhawm chuan nawrh huaihawt an rel a ni a ti.

Mizoram puma CSS hnathawkte chuan lungawilohna lantirin an awmna hmun theuhah an pungkhawm ve bawk a, nimina AMCECC lungawi lohna lantirna hi Mamit, West Phaileng, Marpara, Kolasib, Pukpui, Vairengte, Kawmpui, Champhai, Farkawn, Darlawn, Sialsuk, Lawngtlai, Chawngte, Bualpui, Sangau, Lungpher, Lunglei, Zobawk, Tlabung, Siaha, Tipa, Saitual, leh Phuaibuang ah te pawh neih a ni.

AMCECC hian Mizoram sorkar laka an thil phut hrang hrang chungchangah thu lawmawm hriat tur a awm loh avangin lungawi lohna lantir nan tun thla September ni 9 atanga ni 11 thleng khan Mass Casual Leave an lo la tawh a ni.

(Corr : Maremi)

<><><>

GST REFORM

Sorkar laipuiin Goods and Services Tax (GST) a siamthatna hnuaiah chhiah a hniam chuan mipui sumin a lei theih a tam sawt dawn avangin economy chu nasa taka invawrh chho tura ngaih a ni.

Akashvani Aizawl chuan sorkar laipuiin GST a siamthatna GST 2.0 chungchangah mithiam hrang hrang a kawm a, hetah hian PUC-a Economics assistant professor Pu Daniel Lalawmpuia chuan sorkar laipuiin September ni 4-a GST siamthatna liantham tak a kalpuina a, a tum ber chu ram chhunga middle class leh sum lalut tlem zawkte khawsak awlsam zawkna atan leh thil an lei atanga economy chevel tihhmasawn a ni a ti a, mithiamte chuan chhiah tih hniamna avanga mipui nawlpui thil lei belh tamna tur an chhut chu za zela 5 atanga za zela 10 vel zet a ni tih sawiin, chhiah a hniam chuan mipui sumin a lei theih a tam sawt dawn avangin economy chu nasa taka invawrh chho tura ngaih a ni a ti.

Pu Daniel Lalawmpuia chuan GST rate thar hnuaia thil man tlahniam zingah lirthei man te chu a nuai dawna a tlakhniam dawn avangin lirthei lei tumte chu September ni 22-a GST thar a taka hman hun nghak turin a chah a, lirthei bakah hian nitin mamawh sabon atanga toothpaste te, nunna atana damdawi pawimawh (life-saving drugs), car tenau, two wheeler, TV, AC, insakna hmanruea cement leh loneihna lama hmanraw pawimawh tak tak te a tel tih sawiin, GST tihhniamin a tum ber chu ram chhunga mipui nawlpuite phurrit tihhniam a ni a, hun rei vak lovah chuan chhiah hmuh te a tlahniam tura ngaih ni mah se, hun a kal leh deuh chuan in recover leh thei tura beisei a nih thu a sawi bawk a ni.



GST

Prime Minister Narendra Modia'n kumin Independence Day lawmnah GST chhuan thar hman a nih tur thu a puang a. Hei hi tun thla ni 3 a GST Council thukhawm chuan a taka rawn ti puitlingin chhiah lak dan chhawng li ni thin chu chhawng hnihah tittlemin awlsam zawkin a rawn siam danglam a. GST zaa 5, 12, 18 leh 28 a lak thin chu zaa 5 leh 18 ah tihhniam a ni a. Mi naran leh mi nawlpuite tana hlawkna thlen thei tur berin he GST hi siamrem a ni.

Sawrkarin GST rate thar a siamah hian loneitute tana hlawkna tur tam tak a awm a. Loneitute hmanraw pawimawh tak tractor ah chhiah hi zaa 12 lak thin chu zaa 5 ah tihhniam a ni a. Hei bakah hian buhsengna khawl leh leitha siamna hmanruate tihtlawm a ni tawh dawn bawk a ni. Hei vang hian loneituten sum leh paia phurrit an neih thin pawh GST thar hian a chhawk zangkhai hle tura ngaih a ni a, thlai thar chhuah zat pawh a pun ngei beisei a ni.

(Newsonair)



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.



PRESIDENT

Mauritius Prime Minister Navinchandra Ramgoolam chuan nimin khan Rashtrapati Bhavan ah President Droupadi Murmu a hmu a. He hunah hian ram pahnih kaihhnawih thu pawimawh tak tak an sawidun. President Murmu-i chuan India Neighbourhood First Policy te, AHASAGAR Vision leh Global South a thlirnaah Mauritius chuan hmun pawimawh tak a luah thu a lo sawi a. Kawng hrang hrangah ram pahnihte thawhdunna a thang chho zel tih a sawi bawk a ni.

(Newsonair)



AGRICULTURE

Union Agriculture and Farmers' Welfare Minister Shivraj Singh Chouhan chuan kum 2025-26 Rabi season chhungin buh tonne makdtaduai 362.50 thar tum a ni a ti. Nimina New Delhi-a chanchinbumite a kawmnaah he thu hi sawiin Pu Chouhana chuan National Conference on Agriculture-Rabi Campaign 2025 neih zawh takah State Agriculture Minister te nen he thu hi an ngaihtuah a ti a. Ramin a mamawh buh chi khawl sa a awm thu a sawi bawk a ni.

(Newsonair)



AGRI MINISTER

Agriculture & Farmers' Welfare Department Minister Pu PC Vanlalruata chu, ni hnih awh tur National Conference on Agriculture: Rabi Campaign 2025, New Delhi-a neih mek-ah a tel ve a.

Central Sorkar-a Ministry of Agriculture & Farmers' Welfare chuan conference hi huaihawtin, state hrang hranga agriculture minister te sawm an ni a. Nakum Rabi season inpuahchahna hun atan conference hi buatsaih niin, hmalak dan tur te sawi ho-na hun hman a ni.

Agriculture Minister chuan thu sawina hun nein, Mizoram-a agriculture sector-in a mamawh ber chu farm road tha a nih thu a sawi a; Mizoram chu tlang ram a nih avangin,

inkalpawh zung zung a har a. Fur ruahtui a tam chang pheih chuan lei a min nasa thin a, loneitute te tan pawh harsatna tam tak a thlen thin a ni, a ti. Farm Road tha zawk a neih theihnan central sorkar tanpuina an mamawh thu a sawi bawk.

Wet Rice Cultivation hi tunah hectare 8,175-a zau-ah kalpui mek a ni a, heng bakah hian WRC atana la hman theih tur potential area hectare 1,39,372 a la awm thu a sawi. National Mission on Edible Oils - Oil Palm scheme hnuaiah hma an lak mek thu te sawiin, Oil Palm hi Mizoram-ah a tha duh a, farm road a awmthat tawh loh avangin oil palm chingtute pawhin harsatna an tawh mek thu a sawi.

Tung bikah sorkarin tan a lak chhoh leh mek thu sawiin, Tung promotion atan hian Action Plan Nuai 399.37 chu sanction a awm tawh a, chak zawka hmalak a nih theihnan NMEO-Oilseeds scheme hnuaiah Tung hi telh ve theih ni se tiin Union Agriculture Minister chu a ngen bawk a ni.

National Food Security & Nutrition Mission hnuaiah field pea leh rajmah bikah cluster demonstration an kalpui mek thu te leh, rice-pulse cropping an kalpui thu sawiin, thlai chi pawh quintal 24.90 sem a nih tawh thu a tarlang. Rabi Season lo awm turah pawh ICAR-IIPR leh NEH te nen thawk hovin, hma lak chhoh zel tum a ni, a ti.

Minister chuan Oil Palm leh Tung nen Cocoa inter-cropping tura hmalak an tum thu a tarlang. Hetiang tur atan hian Cocoa seedling quality tha tak a ngai dawn a, Mizoram-ah ngei ICAR nen tangkawpin nursery hi bun theih ni se, tiin central sorkar thawhpuih a sawm nghal bawk.

(DIPR)

<><><>

SEVA PARV

Mipui rawngbawl leh sawrkar inrelbawl na tha tih thupui neiin Prime Minister Modia sawrkar chuan hmasawna thlen turin theihtawp a chhuah a. Tun tum Seva Parv pual hunah chuan sawrkar hotu anihna bakah Moida mimal nun tarlang ila.A nun bul tanna tlawm tak atanga politics-a mi ropui tak ni tura Narendra Modia zinkawng hi a danglam bik hle a. Hruaitu dinhmun a luah dan chuan fak leh ngaihven a hlawh a. Mi ropui leh challeng tak takte pawhin Prime Minister Modia mizia hi an fak hle a ni. TV lama sumdawng hausa Mohandas Pai chuan mipui nitin mamawh phuhruk kawngah PM Modia hi a fak hle a ni.

(Newsonair)

<><><>